

畿輔安瀾志

衛河卷一

原委

衛河卷二

原委

衛河卷三

故道

衛河卷四

故道

衛河卷五

隄防

衛河卷六

橋渡

衛河卷七

脩治

衛河卷八

官司

祠廟

水利

畿輔安瀾志

臣王履泰恭纂

衛河卷七

修治

金史河渠志世宗大定四年十月上出近郊見運河湮塞召問其故主者曰戶部不爲經畫所致上召戶部侍郎曹望之責曰有河不加濬使百姓陸運罪在汝等朕不欲加罪宜悉力使漕運通也五年正月尙書省奏調夫數萬上曰方春不可勞民令官籍監戶東官親王人

從及五百里內軍夫濬治

元史河渠志世祖至元二年都水監言運河二千餘里
漕公私貨物爲利甚大自兵興以來失於修治清州之
南景州以北頽缺岸口三十餘處淤塞河流十五里至
癸巳年朝廷役夫四千修築濬條乃復行舟今又三十
餘年無官主領滄州地分水面高於平地全籍堤堰防
護議以瀕河州縣佐貳之官兼河防事於各地方巡視
如有闕破卽率衆修治仍禁園圃之家無穿隄作井栽
樹取土七年省臣言御河水泛武清縣計疏濬役夫一

千工八十日可畢至大元年六月左翼屯田萬戶府呈
五月十八日申時水決會川縣孫家口岸約二十餘步
南流灌本營屯田已移文河間路武清縣清州有司多
發丁夫管令修治延祐三年七月滄州言清池縣居民
告往年景州吳橋諸處御河水溢沖決隄岸萬戶干奴
爲恐傷淇屯田差軍築塞舊洩水郎兒口故水無所洩
迄遣官疏闢引水入海及七月四日決吳橋縣柳斜口
東岸三十餘步千戶移僧又遣軍閉塞郎兒口水壅不
得洩必致漂蕩張管許河孟村三十餘村黍稷廬舍故

本州摘官相視移文約會不從四年五月都水監遣官
與河間路相視元塞郎兒口東西長二十五步南北闊
二十丈及隄南高一丈四尺北高二丈餘復按視郎兒
口下流故河至滄州約三十餘里上下古跡寬闊乃水
減故道名曰盤河今爲開闢郎兒口增濬故河決積水
由滄州城北達滹沱河以入於海泰定元年九月二十
八日興工十月二日工畢 揭傒斯都水監記畧會通
河成之四年始建都水分建於東阿之景德鎮掌凡河
渠壩閘之政令以通朝貢漕天下實京師地高平則水

疾泄故爲竭以蓄之水積則立機引繩以挽其舟之上
下謂之壩地下迤則水疾涸故爲防以節之水溢則縋
起懸板以通其舟之往來謂之閘皆置吏以司其飛輓
啓閉之節而聽其訟獄焉雨潦將降則命積土囊具畚
鍤以備奔軼衝射水將涸則發徒以導淤滯塞奔潰時
則巡河周視以察其用命不用命而賞罰之故監之責
重以煩焉

謹案至元時會通未開歲漕江淮至封邱陸運一百
八十里至淇門入御河故治河之役多在清滄間也

都水監所云運河二千餘里蓋兼衛河言之先是宋人嘗用之以輸邊矣宋金所用卽紀要所謂用衛河之全者也會通成河而江淮之漕由淮泗會汶水以達青滄抵通州乃用衛河之半

宋史河渠志神宗熙寧二年九月劉彝程昉言二股河北流今已閉塞然御河水由冀州下流尙當疏導以絕河患議開烏欄隄東北至大小流港橫絕黃河入五股河復故道詔調鎮趙邢深磁相州兵夫六萬濬之以寒食後入役三年正月韓琦言妨農務詔就寒食前入役

仍相度最遠州縣量減差夫而輟修塘隄夫兵千人代其役二月琦又奏御河漕運通流不宜減大河夫役於是上令樞密院調兵三千并都水監卒二千又益發北城兵三千仍詔程昉等促迫工限六月河成八年昉與劉增言衛州沙河湮沒宜自王供埽開濬引大河水注之御河以通江淮漕運仍置斗門以時啓閉九月十月安撫使文彥博覆實言有害無利枉費工料極多更當選擇其人不當使狂妄輩橫費生民膏血已而都水監言運河乞置雙牐例放舟舡實便與彥博所言不同十

二月知制誥熊本奏臣博采衆論究極利病咸以爲葺故隄堰新口存新牖而勿治庶可以消淤澱決溢之患而省無窮之費萬一他日欲由此河轉粟塞下則暫開亟止或可紓飛輓之勞未幾河果決衛州是時每有一議朝廷輒下水官相度或作或輟迄莫能定大抵自小吳埽決大河北流御河數爲漲水所冒亦或湮沒哲宗紹聖元年四月河北都轉運使吳安持始奏大河東流御河復出詔委前都水丞李仲提舉開導徽宗崇甯元年冬開臨清壩子口詔增修御河西隄置斗門決北京

恩冀滄州永靜軍積水入御河枯渠明年秋黃河漲入御河流浸大名府館陶縣敗廬舍正和五年詔於恩州增修御河東隄爲怕水隄防令京西路差借來年分溝河夫千人赴役於是都水使者孟揆移撥十八埽官兵分地步修築又取棗強上埽水口以下舊隄所管榆柳爲椿木

明實錄太宗永樂十年十二月修靜海至青縣河隄十一年二月修河間府水決隄岸十五年五月遣官巡視北京通州至儀真河道宣宗宣德三年六月命劉觀巡

視河道正統四年十月河間府青縣請築衛河隄岸從之代宗景泰元年十二月工部奏通州抵徐州運河一帶皆淤塞不通恐防漕運通州等處宜遣在京大臣一員提督疏濬詔令都察院擇御史廉能者一人往理之三年九月山東右參議劉整奏臣同僉事王琬專理河道北抵河間之吳橋南至徐州之沛縣道路一千餘里開壩四十餘座乞敕吏部於臨河州縣各添設官一員專理河道仍賜臣敕提督修理從之憲宗成化二年十二月命御史一員提督通州迤南抵臨清及衛輝一帶

河道五年三月工部奏自通州抵天津衛河道淤塞其
自天津以南直抵揚州一帶河道亦有淤淺宜敕總督
等員通行疏通以便漕運從之六年巡按直隸御史張
誥奏請築靜海以南臨清以北一帶河口之被水衝塌
者從之十三年七月管理河道工部郎中楊恭奏六月
以來久雨水溢運河東西岸衝決甚多乞撥京營官兵
修築仍命文武大臣董之章下工部議移文都督同知
陳達同楊恭於通州直隸天津等衛近處量起軍夫三
千名順天府沿河州縣起民夫一千名相兼提淺人夫

并工修築并行戶部每名給與行糧仍令督工官盡心
提督從之二十一年正月詔修河夫月給米人三斗遣
工部左侍郎杜謙自通州抵淮揚督修武宗正德十二
年八月巡按直隸御史吳閭言長蘆濟甯諸處沿河夫
役本以備疏濬修築之用及至冬月寒凍不用其力乃
徵椿草銀其法未爲不善乞令沿河夫役量畱三分聽
用冬月仍徵椿草銀七分官收其直管河副使以時督
令所屬收買傭工從之世宗嘉靖八年河決朱家墳時
運河爲決河所阻費公私數萬金旁開小河方得抵通

十年八月滄州南花園漕河淤阻戶科給事中蔡經劾奏都御史李緋奪緋并管河郎中俸有差九月滄州等處河隄工成穆宗隆慶三年十二月總理河道都御史翁大立言治河之役工部議覆吳橋縣衝決朱官屯交河縣衝決徐家馬頭等處青縣衝決盤古口等處與滄景二州南皮靜海二縣及天津衛堤屬天津兵備道同北河郎中經理從之熹宗泰昌元年十二月工部覆總理河道侍郎王佐疏言此河通漕專藉衛水然上源未暢則下流必壅今漳河已徙衛流已塞獨有挽漳引沁